

SEHOPOTSO: NAKO YA MAKGAOLAKGANG YA TSEPAMISO YA DIBUKA TSA MONGAMOSEBETSI TSA NAKWANA E SE E LE HAUFI

Pretoria, 22 Mphalane 2019 - Beng ba mesebetsi ba hopotswa hore ba salletswe feela ke dibeke tse pedi pele nako ya lekgetho ya Tsepamiso ya Dibuka tsa Mongamosebetsi tsa Nakwana e fihla pheletsong ka la 31 Mphalane 2019. Nako ya ho tsepamisa dibuka e qadile ka la 23 Loetse 2019.

Ho tshwana feela le bagkathatema ba bang le balefalekgetho, beng ba mesebetsi ba kgothaletswa ho sebetsa mmoho le SARS ho ntlafatsa mokotla wa tsa ditjhelete molemong wa ntshetsopele ya Afrika Borwa. Bakeng sa selemo sa ditjhelete sa 2017/2018, PAYE e bile 96.4% ya paloyohle ya Lekgetho la Batho ka Bomong le bokelletsweng (*Sheba: SARS' 2018 Tax Statistics publication, Chapter 1, Table A1.4.2*).

Tsepamiso ya dibuka ya nakwana ya beng ba mesebetsi e akaretsa nako ya ditransekshene tsa dikgwedi tse tshelela ho tloha ka 1 Tlhakubele ho isa ho 31 Phato ha tsepamiso ya ho qetela ya selemo se tletseng e tla ba ho tloha ka la 1 Tlhakubele ho fihlela ka letsatsi la ho qetela la Hlakola, mme e tlameha ho nyehelwa ka Mmesa le Motsheanong. Sena ke paloyohle ya ditsebahatso tse pedi tse lokelang ho etswa ke beng ba mesebetsi ka nako ya selemo sa hlahlobo ho netefatsa hore ditifikeiti tsa basebetsi tsa IRP5/IT3(a) di ntshitswe ka nepo le ka nako bakeng sa sehla sa ho faela lekgetho la lekeno la batho ka bomong.

Ka dinako tsa tsepamiso, mongamosebetsi o tlameha ho tiisa kapa ho lokisa bokaalo boo a bo tsebahaditseng dikgweding tse tshelela tsa pele tsa sehla sa lekgetho bakeng sa Lefa-ha-o-ntse-o-fumana-moputso (Pay-As-You-Earn), Levi ya Ntshetsopele ya Boitsebelo (Skills Development Levy), mmoho le Dikabelo tsa Inshoreense ya ho se sebetse (Unemployment Insurance Contributions) le Lekgetho la Kgothatso ya Khiri (Employment Tax Incentive - ETI), mmoho le ditefo tse entsweng le boleng ba lekgetho bo hlahellang ditifikeiting tsa basebetsi ba bona tsa lekgetho tsa IRP5 /IT3(a). Dintlha tse tlamehang ho tsepama ke ditsebahatso tsa kgwedi ka nngwe, ditefo tse entsweng - ho sa kenngwa dikotlo le ditefo tsa tswala - le boleng ba Lefa-ha-o-ntse-o-fumana-moputso, Levi ya Ntshetsopele ya Boitsebelo le Dikabelo tsa Inshoreense ya ho se sebetse tse hlahellang ditifikeiting tsa IRP5/IT3(a).

Hara diphetoho tse teng tsa selemo sena tsa tsepamiso ya dibuka tsa beng ba mesebetsi tsa nakwana, ke hore Lekgetho la Kgothatso ya Khiri le atolositswe ka dilemo tse leshome ho fihlela ka 2029. Lekgetho la Kgothatso ya Khiri (ETI) ke kgothatso eo sepheo ka yona e leng ho kgothaletsa beng ba mesebetsi ho hira batjha ba batlang mosebetsi. Le fokotsa ditjeo tsa ho hira batjha ka ho fokotsa bokaalo ba lekgetho la Lefa ha o ntse o fumana moputso (PAYE) le kolotuwang SARS ntle le ho ama meputso ya basebetsi. Beng ba mesebetsi ba monyetleng wa Kgothatso ena ba lokela ho fana ka tsepamiso ya EMP501 pele ho mafelo a Mphalane ho tseka bokaalo bofe kapa bofe ba kgwedi ka nngwe bo sa kang ba sebediswa dikgweding tse tshelela tsa pele (Tlhakubele ho isa ho Phato).

Beng ba mesebetsi ba sa faneng le ho etsa tseko ya dikgwedi tsa pele tse tshelela (Tlhakubele ho isa ho Phato) ba tla lahlehelwa ke khrediti efe kapa efe ya Lekgetho la Kgothatso ya Khiri leo ba lokelang ho e fumana.

Beng ba mesebetsi ba emetseng ho nyehela ka nako ya Tsepamiso ya Selemo ka seng ba tla kgona feela ho tseka bokaalo ba khrediti ba nako ya dikgwedi tse tshelela tsa bobedi (Loetse ho isa ho Hlakola), empa e seng bakeng sa nako ya dikgwedi tse tshelela tsa pele.

Dintlafatso

Nako ya Tsepamiso ya Dibuka tsa Mongamosebetsi tsa Nakwana e na le dintlafatso tse latelang:

- Foromo e ntjha ya HTML5 ho eFiling ho ntlafatsa tshebediso le ho fumana melaetsa ka yona nako eo.
- Dikhoutu tse ntjha tsa mehodi di kentswe karolong ya IRP5/IT3(a) foromong e kentseng ditokiso tsa molao tse amang selemo sa jwale sa lekgetho.
- Motjha o bonolo wa ho netefatsa tshebetso ya palo ya lekgetho la khiri bakeng sa ditifikeiti tsa IRP5/IT3(a)
- Ho ka koptjwa setlankana sa akhaonto bakeng sa dinako tsa pele ho 2008.

Dikanale tsa ho faela

SARS e@syFile™ Employer ke tsela e tobileng ho thusa balefalekgetho bao e leng beng ba mesebetsi kapa batsamaisi ba tefo ya meputso, ho tsamaisa merero ya bona ya lekgetho. Beng ba mesebetsi ba ka faela ka tshebediso ya eFiling kapa e@syFile™. Ka eFiling, ho ka nyehelwa ditifikeiti tse fihlang ho 50 tsa IRP5/IT3(a) ha palo ya e@syFile™ e le e sa feleng. Ho faela lekaleng ho na le moedi wa ditifikeiti tse hlano feela.

Ho ngodisetsa basebetsi lekgetho la lekeno

SARS e tlile ka tharollo ya ho etsa dingodiso tsa mothamo o moholo ho e@syFile™ bakeng sa beng ba mesebetsi ho ngodisa basebetsi ba bona bakeng sa lekgetho la lekeno le ho fumana dinomoro tsa lekgetho la lekeno hanghang bakeng sa basebetsi bana. Kahoo sena ha se hloke hore mosebetsi a etele lekala ho ya fumana nomoro ya lekgetho la lekeno.

Ho fumana lesedi le fetang lena rwalla “[SARS e@syFile™ Employer User Guide](#)” kapa “[A guide to using eFiling to register an employee](#)”. Molefalekgetho a ka ikopanya le Contact Centre ho 0800 00 7277 ho fumana thuso.